

3 JUAN

Apostol Juanpa quimsa cag cartan

Juan Gayuta saludangan

¹Cuyay waugi Gayo:

Noga Juan, Señor Jesucristupa
willacuyninta yachatsicog carmi, cay
cartata cartacamü.

²Gampä Tayta Diosmanmi
mañacaycämü imaycachöpis
yanapaycushunayquipä y sänullata
caycatsishunayquipä. Tsaynömi Tayta
Diestaga agradesicü payman yäracur
imaypis cawangayquita. ³Tayta Diospa
willacuyninta cäsucur
cawaycangayquita waquin criyicog
mayintsiccuna chämur willayämaptin
alläpam cushicurgö. ⁴Tsaynö llapan
criyicog mayilläcuna Tayta Dios
munangannö cawaycayangayquita
mayar cushicümi.

Gayo alli rurag canganpita Juan alabangan

⁵Waugi Gayo, allitam ruraycanqui
jucläcunapitapis shamur Tayta Diospa
willacuyninta willacogcunata
patsatsirnin. ^{6,7}Caychö criyicog
mayintsiccuna goricäyanganchömi
paycuna parlayämushga gam cuyapäcog
cayniqiuwan yanapangayquita.
Paycunaga willacur purirnin Tayta
Diosta mana cäsucogcunapataga manam
imancunatapis mañacuyantsu. Tayta

Diospa willacognincunataga
llapancunatapis yanapaycuy. ⁸Tsaynö
yanapashgam waquin marcacunamanpis
aywayanga Tayta Diospa willacuyninta
willacurnin.

Diotrefes mana cäsucog cangan y Demetrio alli rurag cangan

⁹Tayta Diospa willacuyninta
willacogcunata yanapanantsicpä cagta
tantiyatsirnin mas puntatapis
gamcunaman cartacamurgänam. Tsaynö
captinpis Diotrefesga manam
ningäcunata cäsucuntsu. Payga
quiquillan mandacog caytam munan.
¹⁰Tsaynö carnin nogacunapäpis
manacagcunata parlarshi puriycan. Y
nircur carupita yachatsicog waugicuna
chaptin manash chasquintsu. Waquin
patsatsicogcunatanash criyicog
mayintsiccunawan manana
goricäyänanpä micharnin gargur ushan.
Tsaynö canganpitaga chaycamurmi
payta gayapähä.

¹¹Cuyay waugi Gayo, pagtä Diotrefesnö
llutan ruraycunata yachacunquiman. Tayta
Dios munangannö gama allicunata rurar
imaypis caway. Tayta Diosta cäsucur
cawagcunaga wamrancunam cayan. Payta
mana cäsucogcunaga manam
wamrancunatsu cayan. ¹²Waugintsic
Demetriupämi itsanga llapan runacunapis

parlayan Tayta Diospa willacuyninta
cäsucur cawaycanganta. Nogacunapis
paypäga musyayämi Tayta Dios
munangannö cawangantaga. Cay nimungä
rasun cag canganta musyaycanquim.

Cartapa ushanan

¹³Cay cartallachöga manam llapan
yarpangäcunata yätsipämurgötsu.

¹⁴Quiqui shamurnam mascunataga
yätsishayqui.

¹⁵Tayta Diosllantsic yanapaycushuy
alli cawacuychö canayquipä. Caychö
reginacungayqui criyicog
mayintsiccunapis llapayquipämi
salüduncunata apatsicayämun.
Tsaynöllä tsaychö criyicogcunata
nogapa salüdullätapis goycullanqui.